

Powšitkowne WOZJEWJENJA

njedželu, 16. awgusta 2020

„Džak a próstwa“ – Putnikowanje na Marije naroda do Róžanta

Wěriwi ze serbskich wosadow su na swjedženju Marije naroda wutoru, 8. septembra, na putnikowanje pod heslom „Džak a próstwa“ do Róžanta přeprošeni. Předpisanych wotstawkow dla budu kemše hižo we 18.30 hodž. na putniskej łuce. Tež dopołodnja w 9.00 hodž. je w Róžeńće Boža mša. Dyrbjała-li so situacija změnić, so to njedželu, 6. septembra, wozjewi.

Ekumeniski nyšpor ze swjećenjom zelow

Ekumeniski nyšpor ze swjećenjom zelow budže tutu njedželu, 16. awgusta, w 17.15 hodž. w klóštrje Marijinej hwězdze w Pančicach-Kukowje. Na tamnišej zahrodze budžetaj jón katolski farar Dariusz Frydrych z Biskopic a ewangelski farar Thomas Schädlich z Huski swječić. Wopytowarjo móža zela sobu přinjesć a je woswječić dać. Hižo wot 14 hodž. poskići so pisany program za cyłu swójbu. Tak na přikład móža w koncerće „Wróna kuchnja“ z Frankom Fröhlichem z Drježdžan sobu skutkować. Změja tež wiki ze zelemi a regionalnymi produktami w klóšterskej zahrodze a Lipju.

Zetkanje samostejacych

Samostejacy ze serbskich wosadow su na swoje přichodne zetkanje wutoru, 1. septembra, w 14 hodž. do Domu biskopa Bena w Smochćicach přeprošeni. Zajimcy njech so prošu hač do wutory, 25. awgusta, w redakciji Katolskeho Posoła přizjewja, telefonowe čisło (0 35 91) 55 02 12. Tež dalši zajimcy su wutrobnje witani. Kóždy njech sej prošu Wosadnik a masku sobu přinjese, wšako maja so hygieniske předpisy kubłanskeho domu dodžeržeć. Štóž chce wotewzaty być, njech to prošu zdžěli.

Wulět dekanatneje młodžiny

Wutrobnje přeprašujemy serbskich młodostnych na wulět dekanatneje młodžiny njedželu, 30. awgusta. Započnjemy w 15 hodž. z młodžinskim nyšporom w Róžeńčanskej swjatnicy. Přizamknje so přezpólna hra geocaching pod temu „Back to the roots“ (Wróćo ke korjenjam). Wječor wuklinči ze zhromadnej wječerju a spěwnym wječorkom při lěhwowym wohenju. Wot kóždeho wobdžělnika zběra so přinošk we wysokosci 3 eurow. Hygieniske předpisy hladajo na koronowy wirus ma kóždy wobdžělnik dodžeržeć.

Dekanatne dušepastyrstwo za młodžinu

Hudźbny nyšpor w Budyskej tachatskej cyrkwi

Prapremjera twórby „In memoriam Johannes Biehle“ zaklinči mjez druhim na hudźbnym nyšporje sobotu, 22. awgusta, w 17.15 hodž. w Budyskej tachatskej cyrkwi. Cyrkwinskaj hudźbnaj direktoraj Friedemann Böhme z Budyšina a Reinhard Seeliger ze Zhorjelca na pišćelomaj kaž tež šola Budyskeho tachatskeho chóra jón wuhotuja.

Serbske kemše w Drježdžanach

Drježdžanscy Serbja su na maćernorěčnu Božu mšu njedželu, 23. awgusta, w 16.00 hodž. do cyrkwy swjateho Antonija w Drježdžanach-Löbtauwje, Bünauska hasa 10, přeprošeni. Kemše změje farar Gabriš Nawka z Kulowa.